



**Dumbraziun da selvaschina**

En Surselva han ins dumbrà en ina notg 2225 tscharvas. Quai è levamain dapli che l'onn passà.

3



**Cornelia Candreia e la scola da skis**

La pagina dals giuvens da Surmeir preschenta oz la scolasta da skis Cornelia Candreia.

6

südostschweiz

# LA QUOTIDIANA

Redacziun: Via Sommerau 32, 7007 Cuirà, tel. 081 255 57 10, redacziun@laquotidiana.ch



Politica e gastronomia unida: Cusseglia Jon Domenic Parolini, Casimir Platzer, president Gastro Suisse, e Franz Sepp Caluori, president Gastro Grischun (da san.). FOTO G. N. STGIER

## In «mini curs d'ustiers»?

DA GION NUTEGN STGIER / ANR

■ A Curvalda ha gi lieu ier la radunanza annuala da Gastro Grischun. In tema è cunzunt er stads ils custs auts che fan anc adina quitads als ustiers grischuns. Il president Franz Sepp Caluori pretenda dals gastronoms dapli savida da las regulaziuns da victualias e higiena. En preschientscha da cusseglier guvernativ Jon Domenic Parolini e da Casimir Platzer, il president da Gastro Suisse, èn s'entupads ils delegads e las delegadas da las 16 secziuns che fan part da Gastro Grischun. La branscha patescha

anc adina dal ferm franc svizzer cunzunt er cun ir ils Svizzers adina dapli sur il cunfin per mangiar pli favuraivel. L'onn passà han ils Svizzers consumà en nossas naziuns vischinas per ina summa da quatter milliardas francs. Il president Franz Sepp Caluori vegn ad inoltrar en il decurs da l'atun danovamain in postulat a la regenza per l'introducziun dad in curs per novs ustiers, in «mini curs» deditgà a las regulaziuns da victualias e da la higiena. Dapi 20 onns n'exista en il Grischun nagin curs d'ustiers pli.

> PAGINA 2

## Giuvenils – buc affons, buca carschi

DAD AUGUSTIN BEELI / ANR

■ La lavur da giuventetgna ei ina sparta che biars carschi capeschon buca propi. «Ils giuvenils han gie tut quei ch'els drovan», vegn ei getg. Ina canorta porscha denton avantatgs pil svilup futur. Lumnezia ed Ilanz/Glion collavuran perquei. Cun tuts mondi ei meglier che zacu, els vegnien puppergnai, sappien far scolaziuns, ei detti ina massa posts da cussegliaziun, uniuns, sport, musica. Tals commentaris aud'ins tscheu e leu en connex culla lavur da giuventetgna. Elisabeth Lorez, la presidenta dalla cumissiun da giuventetgna Ilanz/Glion-Lumnezia, puntuescha che quella lavur seigi fetg impurtanta, e quei buca mo els marcaus e giu la Bassa. «Ei va era per tgirar la veta sociala ordeifer la scola, pigl entupar camerats e collegas sco era per tgirar las amiceziuns», declara la presidenta dalla cumissiun da giuventetgna Ilanz/Glion-Lumnezia. En omisdus vischnauncas han ils giuvenils ussa caschun da s'entupar en in tal liug. Zaco ei la canorta da giuventetgna empau sco ina «ustria», pia



Ellas s'audan tier la squadra dalla canorta da giuventetgna da Cuschnaus: Mintga venderdis sera ein Flavia Riedi (seniester) e Barla Collucello presentas leu. FOTO A. BEELI

in liug public per s'entupar. Igl 1. d'avrel 2017 ha Ibolya Mauch entschiet sia lavur en piazza da 70% sco responsabla per las canortas

da giuventetgna dallas vischnauncas Ilanz/Glion e Lumnezia. Cun ella lavuran Flurina Camenisch e René Ochsenbein a

Glion sco era Barla Collucello e Flavia Riedi a Cuschnaus.

> PAGINA 3



Michal Buchovecky, Brigitta Emmenegger, Nicole Sprenger e Gian Michel Denoth (da schn.) fan part dal team da magisters chi instruischan a la Scuola R. Steiner a Scuol. FOTO F. ANDRY

## Scoula R. Steiner a Scuol as preschainta

■ (anr/fa) Ingon ha la Scuola R. Steiner a Scuol 27 scolaras e scolars, tants sco amo mai. In sonda driva la scoula in Sotchè sias portas. Daspö 17 ons exista a Scuol ün'alternativa a la scoula populara, nempe l'anteriura Scoula libra chi's nomna uossa Scoula R. Steiner. Actualmaing tilla frequentan 27 uffants da tuot l'Engiadina. Las scolaras e'ls scolars vegnan instruits in trais

s-chalins, da prüma fin terza, quarta e tschinchavla e sesavla fin ottavla classa. Eir scha blers dals uffants nu sun da lingua rumantscha vain instrui eir rumantsch. La scoula vain manada da Gian Michel Denoth. In sonda davomezdi, ils 8 avrigl driva la scoula a Scuol sias portas per tuot ils interessats.

> PAGINA 9

## Scumond da pestgar

■ (rtr) En il Lai dad Ova Spin ed en l'aua dal Spöl en il Parc Naziunal Svizzer èsi scumandà da pestgar. Quai ha decis il chantun en vista a l'aua contaminada cun PCB.

PCB èn cumbinaziuns da chlor toxicas che pon effectuar cancer. Fin ils onns 1980 èn questas vegnidas duvradas surtut en transformatur ed implants electricos sco liquid idraulic, però er sco lomiaders en lacs e meds d'isolaziun. PCB tutga entant tar las 12 substanzas toxicas organicas ch'èn vegnidas scumandadas il 2001.

Il chantun scumonda da pestgar en il Spöl ed en il Lai dad Ova Spin. Quai pervi da la contaminaziun cun Polichlorbiphenil (PCB). Ina gruppa da lavur tschertga anc adina schliaziuns per eliminar il tissi da l'ambient en la regiun pertutgada. Ils resultats da novas mesiraziuns duain esser sin maisa las proximas emnas.

L'aua dal Spöl era vegnida contaminada entras lavurs vi dal mir da fermada da Punt dal Gall. Mesiraziuns han mussà che l'aua dal Spöl cuntegn la substanza toxica PCB. La substanza na sa reducescha betg biologicamain uschia ch'ella resta e sa derasa en la chadaina da nutriment.

## Ovra preparativa sin Pastgas

Il Chor viril-baselgia Savognin conta «La veia dalla crousch»

■ (anr/ff) Igl oratori dil cumponist Alvin Muoth e digl autur Peder Cadotsch ei vegnius presentaus la fin d'janma vargada a Cuera ella baselgia dalla sontga Crusch ed a Glion ella baselgia dalla claustra. Las duas proximas produzioni han liug ella baselgia da Nossadonna a Savognin. La cumposiziun d'Alvin Muoth ha tutas premissas da daventar in'ovra monumental-

la. La premaudiziun ha giu liug igl onn 1994 cul Chor viril Alvra cun 80 cantadurs, da lez temps dirigius dil cumponist sez. Ils cantadurs da Savognin han empiriu igl oratori en numerusas emprovas dapi varga in onn. Els concerts actuals han els demussau ch'els ein carschi per la pretensiussa ovra e che quella tuna perschuadent sulet cun 40 vuschs virilas. Quellas vegnan accumpi-

gnadas da Clau Scherrer sill'orgla. Il solo dalla sopranista Letizia Scherrer munta in'extensiuon digl artg melodic. Per interpretar la dramaturgia dall'ovra ha il dirigent Gianign Arpagaus integrau cun bien sensori modulaziuns canticas. Il chor surmiran presenta igl oratori a moda perschuadenta e penetronta.

> PAGINA 4



La crusch ei stada el center dil cant dil Chor viril-baselgia Savognin. FOTO M. HARTMANN



20014  
9 771424 749004

Servetsch d'abunents e da distribuziun: tel. 0844 226 226 mail: abo@somedia.ch